

RAHARAH DANIL RADJAN

Nitondra fanazavana ny mpisolovava ireo voampanga

Na dia efa noafahan'ny fit-sarana aza izy 4 mirahalahy voarohirohy momba ny raharaha Danil Radjan ny alatsinainy teo, naverina eny Tsiarahy ihany izy ireo. Manoloana izany, nitafa tamin'ny mpanao gazety ny mpisolovava azy ireo ny talata teo dia Me Fanomezantsoa Heriniaina, sy Me Rambeloson Njivason Nathalie. Nambaran'izy ireo fa nisy ny herisetra nataona mpitandro filaminana tamin'ny olona arovany teny amin'ny fitsarana ny alatsinainy teo, mpitandro filaminana izay mbola saika haka an-keriny ireo voampanga. Mahakasika ity raharaha ity fanindroany no natao ny fitsarana azy ireo ary indroa no nohafahan'ny fitsarana izy ireo. Araka ny nohamafisin'ny mpiaro azy efatra mirahalahy, raha cassation no votoatin'ny didy laharana 357 navoakan'ny Fitsarana Tampony tamin'ny 24 Septambra 2021 dia midika fa rava ilay didy nanafaka azy ireo tamin'ny 3 Jona 2021, laharana faha 295. Tsihivina anefa raha ny fanazavana, fa matoa rava io didy io dia mihevitra ny Fitsarana Tampony, fa misy porofo hafa tokony nodinihana. Izay no nandrasana tamin'ny fotoampitsarana ny alatsinainy 21 Martsa 2022 izay « première session criminelle » ny taona



Ireo mpisolovava ireo voampanga tamin'ny raharaha Danil Radjan.

2022, satria tsy ampy raha ny herisetra nihàtra tamin'izy ireo fotsiny, no ilazana fa « avec ex-torqué », na fiaiken-keloka antery no nahafaka azy 4 mirahalahy hoy ireo mpisolovava. Nandrasana avokoa ny porofo vaovao nentin'ireo mpitory saingy tsy nisy izany. Tetsy ankilany nanana porofo mafimafy kokoa sy maro ireo mpiaro ireo voampanga, ka naharesy lahatra ny fitsarana indray hanafaka azy rehetra dia ireo teratany gasy telo sy teratany frantsay iray. Tsy maintsy mijanona amponja kosa anefa izy ireo kanefa tsy sazy akory izany, fa fepetra efa mihàtra manerana ny nosy, fa miandry izay mety ho « pourvoi » aton'ny famp-

noavana ambony anatin'ny 72 ora alohan'ny hivoahany. Ny zava-nisy nampisavorovoro ny alatsinainy teo teny amin'ny fitsarana dia ny herisetra nateraky ny hetsika nataon'ireo avy ao amin'ny Brigade Criminelle, sy olon-tsotra viitsivitsy nanao tenue civile taorian'ny fotoampitsarana tao anatin'ny tribonaly Anosy. Nilaza mantsy izy ireo fa manana didy fampisamborana an'i Lionel LELIEVRE izay iarahany manatanteraka amin'ny Interpol noho ny fitoriana misy any ivelany, saingy tsy nety nampiseho ny didy fampisamborana teny an-tanany izy ireo, na nitaky izany aza ny mpiaro ireo voampanga noafahana. Ny lalàna dia milaza mazava raha

ny fanazavan'ny mpahay lalàna, fa raha misy didy fampisamborana dia « écrou » na fonja avy hatrany no mihàtra, fa tsy azo entina tsotra izao ny olona iray. « Tsy ara dalàna ireny amboetra ireny », hoy ny mpiaro ity vazaha ity. Voatery niditra an-tsehatra ireo mpisara namoaka didy sy ny fampanoavana ambony hilaza fa tsy maintsy mamita ireo 72 ora eny am-ponja aloha izy ireo, izay vao manohy izany procédure izany any Frantsa. Tsotra ny antony : efa voaray hitsara ny Fitsarana Malagasy, ka tsy maintsy mamita izany aloha (règle de la première juridiction saisie) ary ny fampisamborana dia mitondra any amponja avy hatrany. Araka izany, ireo 72 ora ireo dia tsy sazy akory. « Lionel LELIEVRE, kosa dia tsy afaka miala amin'ny Fitsarana any ivelany, saingy tsy antony izany hanaovana ireny herisetra ireny », hoy ireo mpisolovava. Milaza ihany koa ireto mpisolovava ireto, fa efa azo ny tapakilan'ny fiaramanidina handehanany any ivelany, azo hatao hoy izy ireo no maka mpitandro filaminana haka azy eny Tsiarahy any hanaraka azy hatreny Ivato, mialohan'ny handehanany olona arovany any an-dafy.

Niaina

Mpianatra ho zandary

Misokatra ny fifaninanana ho amin'ny andiany faha-77

Nisokatra nanomboka omaly 23 martsa ny fifaninanana hidirana ho mpianatra ho zandary andiany faha-77. Misy ny fanambarana avy amin'ny Zandarimariam-pirenena mahakasika izay: "Antsoina ireo Lahy Vavy teratany Malagasy, maniry handray anjara amin'ny fifaninanana hidirana ho mpianatra ho zandary andiany

faha 77, fa efa misokatra ny fit-soratana anarana amin'izany fifaninanana izany. Mari-pahazana: manana mari-pahazana ambonin'ny Bakalorea na ny mitovy lenta aminy. Taona/halava: Lahy: 20-30 taona; +1,68 m. Vavy: 20-28 taona; +1,63 m. Miaramila: 20-34 taona. Fanombohan'ny fametrahana

ny antontan-taratasy: 23 martsa 2022. Faran'ny fametrahana antontan-taratasy: 13 mey 2022. Fifaninanana dingana voalohany: 02 sy 03 jolay 2022. Fadio ny kolikoly sy ny fisehoana mahafantatra olona ambony. Tsy misy olona na iray aza afaka hampiditra anao ato anivon'ny Zandarimaria, fa ny

fahaizana sy ny fahamendrehana anananao ihany", hoy ny fanambarana. Ny andinindiny momba ity fifaninanana ity koa dia ho hita amin'ireo tobin'ny Zandarimariam-pirenena rehetra manerana ny Nosy.

Niaina

Ong TAK

Nizara fanampiana ho an'olona sahirana miisa 1200

Tokantrano miisa 400 no nisitraka fanampiana ara-pitaovana sy sakafo (vary iray kitapo 50 Kg, vilany, fatapetra, kojakoajandakozia, fitaovam-pianarana, firakotra "Koweit", voamaina, Ronono...) avy amin'ny Ong TAK (Tetik'asa Ankizy Kris-masy), izay natao tetsy amin'ny Kianja Mitafo Mahamasina omaly maraina. Nilaza Andriamatoa Randraimananjara Philibert filoha nasionalin'ny Ong TAK, fa ny fiangonana no manome ny lisitr'ireo fianakaviana izay tena sahirana ara-pivelo-



Ny fizarana fanampiana nataon'ny ONG TAK tetsy Mahamasina.

mana eny anivon'ny Fokontany, ka mila fanampiana. Nanohy fa-

nazavana Andriamtoa Philibert, fa ankoatran'ny fizarana sakafo

SAMPANA MPANAZAVA SY TILY MIARA-MIASA

Mikarakara hetsika "Antsan-kiram-piderana"

Ny Vondrona Tily sy Vondrona Mpanazava Fivondronana 370 avy ao amin'ny FJKM Tsiarahy Fihavaozana, sy ny Fivondronana 205 SILOAMA avy ao amin'ny FJKM Anosizato Andrefana, dia mikarakara hetsika iray lehibe "ANTSAN-KIRAMPIDERANA", izay hotanterah-

hina ny Talata 29 Martsa 2022 amin'ny 2 ora tolakandro, ao amin'ny FJKM FONENANA MASINA FIHAVAOZANA ANOSIZATO ANDREFANA. Handray anjara amin'izany, ny antoko mpihira AMPIFITIA, TSIARO (La voix d'or); ny mpanakanto nasaina manokana

BAREA MAMPIFALY. Ny tanjon'izy ireo amin'izao hetsika izao, dia ho fampivoarana sy fampiroboroboana ny fanatsarana, ny sehatry ny fanabeazana skotisma ho an'ny fivondronana. Tsy misy ny vidim-pidirana, fa valopy no zaraina, izay azo rai-

sina ao amin'ny FOIBE SAMPATI FJKM - varavarana 508, sy ao amin'ny FJKM FMF Anosizato Andrefana, sy amin'ny fotoanan'ny hetsika ny talata. "Tongava maro, fa hery lehibe ho anay ny fanotronan'ise", hoy ny mpikarakara.

Radafy

Tenisy Championnats d'Afrique U14, Egypta

Tamin'ny talata teo no niditra an-tsehatra ny katita Malagasy

Tamin'ny talata 22 martsa 2022 teo, no niditra an-tsehatra ny katita Malagasy, matrika ny fifaninanana « Championnats d'Afrique U14 », tontosaina any Egypta. Teo amin'izay 1er jour (1/16-dalana) izay dia toy izao no vokatry azon'ny solontena Malagasy : Mitia Voavy Andraina nandresy an'i Zara El Zein (Zimbabwe) 6/1, 6/2. Nicolas Fays nandresy an'i Dilan Da Silva (Zimbabwe) 6/0, 6/0. Mirija Andriantefiharina resin'i Cheril Elnomrosy (Egypte) 7/6, 2/6, 1/6. Mirindra Razafinarivo nandresy an'i Lamis Houas (Tunisie) 6/1, 7/5. Omaly alarobia 23 sy anio alakamisy 24 martsa 2022 dia ny lalao 1/8-dalana no natrehan'ny solontena Malagasy : Mirindra Razafinarivo - Mitia Voavy Andraina (Madagascar) # Serra Attiv - Sahnoun Nour (Tunisie). Nicolas Fays - Mirija Andriantefiharina (Madagascar) # Ahmad Wageh Yassin - Reda Ezza Eyad (Egypte). Match de classement -Mirija Andriantefiharina (Madagascar) # Nyakundi Ondingo Brian (Kenya). 1/8 èmes de finale du simple : - Nicolas Fays (Madagascar) vs Tarek Abbes Mohamed (Egypte). - Mitia Voavy Andraina (Madagascar) vs Yasser Haya (Egypte). - Mirindra Razafinarivo (Madagascar) vs Judy Tawela (Egypte).

Rainilita



Santionan'ny delegasiôna malagasy any Egypta.

Rugby eto Madagasikara

I Mariana Mbaky no hitantana ny tetikasa Alafia

Fantatra izao fa ilay tovovavy Malagasy 21 taona, Mariana Mbaky, no hitantana ny fandaharanasa Alafia, izay tetikasa mikendry ny fandraisana anjara amin'ny firongatry ny taranaka mpanabe sy mpitarika tanora misokatra amin'izao tontolo izao, afaka mampiasa fanatanjahantena handraisana anjara amin'ny sehatra, handray anjara amin'ny firaisankina iraisam-pirenena ary ho fampandrosoana maharitra aty Afrika. Raha ny marina dia hetsika ahitana fianarana rugby fampianarana isan-kerinandro, fivoriana fanairana tsy tapaka momba ny soatovin'ny maha-olom-pirenena manerantany sy ny kolontsaina, fiaraha-mientana ara-tontolo iainana, hetsika ara-tsôsialy-fanatanjahantena ary atrikasa fanofanana ho an'ny mpanabe, mpampianatra ary tanora Malagasy amin'ny fahasamihafan'ny fiaraha-monina misy azy izy ity. Ny fiaraha-mitantana "Terres en Mèlées" sy ny Malagasy Rugby ary ny DREN sy ny DRJS Atsimo Andrefana, tohanan'ny Société Générale ary ny « Sport en commun », no ahafahana manatanteraka an'ity tetikasa ity. Efa miroborobo any Maroc, Togo ary any Burkina Faso izy ity, ka ho sitrahana eto Madagasikara koa ankehitriny ary any Atsimo Andrefan'i Madagasikara no hanatanterahana azy. Ankoatra an'i Mariana Mbaky, izay manana ny maripahaizana «Educatrice de rugby» ary efa hatramin'ny faha-16 taonany no niditra teo amin'ny sehatry ny taranja rugby dia efa misy mpampianatra Malagasy miisa 40, no efa voaofana hampita an'izany tetikasa izany ankehitriny ary ankizy mahatratra 4000 isa (eo anelanelan'ny 08 sy 16 taona ary ny 50% amin'ireo dia tovovavy avokoa) any amin'ny sekolim-panjakana any Atsimo andrefan'i Madagasikara any no hisitraka azy: hangonina sy ho beazina. Marihana fa amin'izao hetsika izao dia mety ho lasa « Ambasadrice de l'égalité de genres à Madagascar et en France » i Mariana Mbaky.



Rainilita

I Mariana Mbaky.